



**MALAYSIA**

# **PENYATA RASMI PARLIMEN**

*Parliamentary Debates*

## **KAMAR KHAS**

*Special Chamber*

**PARLIMEN KEEMPAT BELAS  
PENGKAL KELIMA  
MESYUARAT PERTAMA**

## K A N D U N G A N

### UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Keperluan Segera untuk Menyediakan Lebih Banyak Rumah PPR di Sandakan**  
- YB. Puan Vivian Wong Shir Yee (*Sandakan*) (Halaman 1)
- **Kualiti Pendidikan Prasekolah**  
- YB. Tuan Sivakumar Varatharaju Naidu (*Batu Gajah*) (Halaman 4)

**MALAYSIA**  
**KAMAR KHAS**  
**PARLIMEN KEEMPAT BELAS**  
**PENGGAL KELIMA**  
**MESYUARAT PERTAMA**

**Khamis, 24 Mac 2022**

**Mesyuarat dimulakan pada pukul 2.30 petang**

**DOA**

*[Timbalan Yang di-Pertua (Dato' Mohd Rashid Hasnon)  
mempengerusikan Mesyuarat]*

---

**UCAPAN DI BAWAH USUL**  
**BERKENAAN PERKARA TADBIR KERAJAAN (P.M. 17)**

**Keperluan Segera untuk Menyediakan Lebih Banyak  
Rumah PPR di Sandakan**

**2.34 ptg.**

**Puan Vivian Wong Shir Yee [Sandakan]:** Terima kasih Tuan Yang di-Pertua. Yang Berhormat Timbalan Menteri, yang diwakili oleh Yang Berhormat Timbalan Menteri Pendidikan. Soalan saya kepada Yang Berhormat Menteri Perumahan dan Kerajaan Tempatan (KPKT), saya ingin membawa perhatian kepada Yang Berhormat Menteri tentang keperluan segera untuk menyediakan lebih banyak rumah PPR di Sandakan di bawah RMKe-12.

Tuan Yang di-Pertua, berdasarkan jawapan KPKT pada sesi Parlimen 1 November 2021 yang lepas, Menteri menyatakan bahawa terdapat 23,778 unit rumah setinggan direkodkan di Sabah bagi jumlah semasa ketika itu dan Sandakan mempunyai paling banyak rumah setinggan dengan 6,516 unit, diikuti oleh Semporna (4,297 unit), Lahad Datu (3,711 unit) dan Tawau (3,600 unit).

Ini bermakna lebih dari 27 peratus jumlah keseluruhan rumah setinggan di Sabah sahaja adalah terletak di Sandakan. Mengambil jumlah saiz purata isi rumah dari Jabatan Statistik, ini juga menterjemahkan bahawa kepada lebih 38,000 orang ketika ini tinggal di kawasan setinggan di seluruh Sandakan. Kawasan setinggan ini juga tidak mempunyai akses kepada bekalan air bersih dan tinggal dalam suasana yang sempit dan tidak bersih.

Bagaimanapun, daripada jawapan sama KPKT pada sesi Parlimen tahun lepas, daripada 3,090 unit rumah PPR yang berada dalam pembinaan ketika ini di Sabah, tidak ada satu unit pun daripada jumlah itu dibina di Sandakan. Ini bermakna kerajaan tidak mempunyai perancangan baharu bagi pembinaan rumah PPR baharu untuk Sandakan walaupun daerah kami mempunyai jumlah paling banyak rumah setinggan di Sabah. Bagaimanakah ini boleh menjadi logik dan munasabah?

Tuan Yang di-Pertua, ketika ini terdapat ribuan pemohon rumah PPR juga difahamkan berada dalam senarai menunggu dengan Majlis Perbandaran Sandakan. Permintaan untuk rumah PPR melebihi jumlah PPR yang ada

sehingga difahamkan ada 'konco-konco' yang telah menjual borang permohonan PPR ini dengan harga yang sangat tinggi. Perkara ini sangat menyusahkan ramai golongan B40.

Tuan Yang di-Pertua, dengan melihat situasi semasa pandemik COVID-19, adalah lebih penting sekarang untuk kerajaan dengan segera membanteras koloni setinggan sedia ada yang mana berpotensi membawa kepada bahaya kesihatan awam kepada negara.

Justeru itu, terdapat keperluan segera dan mendesak bagi kerajaan untuk menyediakan lebih banyak rumah awam mampu milik di Sandakan dalam masa yang terdekat dan saya juga menyeru kepada Yang Berhormat Menteri untuk mempercepatkan atau mempertimbangkan untuk membina lebih banyak projek perumahan PPR di Sandakan di bawah RMKe-12. Sekian, terima kasih.

### **2.37 ptg.**

**Timbalan Menteri Pendidikan II [Datuk Mohamad bin Alamin]:** Terima kasih kepada Yang Berhormat Sandakan. Jawapan yang telah diberikan dan yang akan saya sampaikan adalah seperti berikut. Tuan Yang di-Pertua, terima kasih atas keprihatinan Ahli Yang Berhormat mengenai keperluan segera untuk menyediakan lebih banyak rumah Program Perumahan Rakyat (PPR) di Sandakan.

Kementerian Perumahan dan Kerajaan Tempatan (KPKT) sentiasa memastikan tiada golongan yang dipinggirkan apabila melibatkan perumahan terutamanya golongan setinggan. Untuk makluman Ahli Yang Berhormat, sehingga kini, KPKT telah membina sebanyak 154 projek PPR di seluruh negara yang merangkumi 97,196 unit rumah.

Daripada 154 projek PPR yang telah siap tersebut, sebanyak 98 projek adalah merupakan PPR yang disewa merangkumi 81,373 unit rumah. Pada masa yang sama, terdapat 11 projek PPR Disewa sedang dalam pembinaan yang merangkumi sebanyak 5,470 unit rumah.

Terdapat sebanyak tujuh projek PPR dalam perancangan yang merangkumi 2,770 unit rumah. Kementerian juga sentiasa memohon dengan agensi pusat untuk meluluskan Projek-projek PPR Disewa yang baharu supaya bantuan kepada golongan yang layak dan memerlukan rumah pada kadar sewa yang rendah dapat ditingkatkan.

Pelaksanaan projek PPR di Sabah setakat ini merupakan bilangan yang terbesar dengan jumlah keseluruhan sebanyak 38 projek. Daripada jumlah tersebut, sebanyak 33 projek telah siap dibina merangkumi 23,009 unit manakala lima projek lagi dalam peringkat pembinaan merangkumi 3,090 unit. Secara keseluruhannya, bilangan PPR yang telah siap di Sabah merupakan 21.4 peratus daripada bilangan PPR yang telah dibina di seluruh negara.

Pelaksanaan projek PPR di Sandakan merupakan yang terbanyak jika dibandingkan dengan daerah-daerah lain di Sabah dan juga daerah lain di seluruh negara. Bilangan projek PPR sedia ada di Sandakan adalah sebanyak sembilan projek melibatkan 6,080 unit rumah yang merangkumi 26.4 peratus jumlah PPR di keseluruhan Sabah dan 6.25 peratus berbanding seluruh Malaysia.

Kesemua sembilan projek PPR di Sandakan telah diserahkan kepada KKTP Sabah. Daripada jumlah ini, sebanyak 3,904 telah diisi dan 2,176 masih

kosong disebabkan oleh kerja-kerja pembaikan, manakala tiga projek PPR diwartakan sebagai Pusat COVID-19 iaitu

- (i) PPR Batu Putih, Sandakan (900 unit);
- (ii) PPR Ulu Pirasan, Kota Belud (900 unit); dan
- (iii) PPR Mukim Sapagaya, Lahad Datu (410 unit).

Kementerian berharap pengisian oleh pemohon yang layak akan dapat dilaksanakan dengan segera sebaik sahaja projek tersebut tidak lagi digunakan sebagai pusat kuarantin termasuklah PPR Batu Putih di Sandakan. Sehingga 31 Januari 2022, sebanyak lima projek PPR sedang dalam pembinaan di Sabah seperti berikut:

- (i) PPR Kiansom, Inanam (1000 unit);
- (ii) PPR Jalan Tungku, Lahad Datu (650 unit);
- (iii) PPR Gayang II, Tuaran (500 unit);
- (iv) PPR Tagasan (500 unit); dan
- (v) PPR Pitas (440 unit).

KPKT sentiasa melihat keperluan PPR di seluruh negara dengan mengambil kira peruntukan sedia ada, kesesuaian lokasi dan faktor taburan penduduk. Kerajaan akan terus komited dalam menyediakan PPR kepada golongan yang memerlukan. KPKT memohon agar kerajaan negeri terus membantu mengenal pasti cadangan lokasi yang bersesuaian untuk program-program perumahan mampu milik khususnya PPR.

Sekiranya terdapat keperluan PPR di sesebuah lokasi, Ahli Yang Berhormat bagi kawasan terlibat boleh mencadangkan kepada kerajaan negeri. Seterusnya, kerajaan negeri akan selaraskan permohonan dengan pihak KPKT berserta tapak cadangan lokasi milik kerajaan negeri yang bersesuaian. KPKT akan mengemukakan permohonan peruntukan untuk pembinaan PPR tersebut kepada Unit Perancang Ekonomi (EPU) tertakluk kepada kesesuaian lokasi yang dicadangkan.

Untuk makluman Ahli Yang Berhormat, pada masa kini, permohonan PPR tidak lagi menggunakan borang manual. Permohonan dibuat secara *online* melalui Sistem Pengurusan Perumahan Negara (SPRN) yang boleh dicapai melalui [sprn.kpkt.gov.my](http://sprn.kpkt.gov.my). Malahan, KPKT juga turut turun padang untuk membantu pemohon mengisi permohonan secara *online* dengan kerjasama PBT yang menyediakan fasiliti dan kemudahan seperti dewan dan kemudahan komputer serta internet kepada pemohon yang berminat.

Dalam penyediaan Rumah Mampu Milik (RMM) di bawah KPKT, Kerajaan Negeri Sabah telah banyak bekerjasama dalam menjayakan pelaksanaan program-program tersebut. Sehubungan itu, kementerian ini merakamkan ucapan penghargaan dan terima kasih kepada Kerajaan Negeri Sabah atas kerjasama erat dalam memastikan kejayaan program perumahan mampu milik di Sabah. Pihak KPKT juga mengalu-alukan sebarang idea dan cadangan baharu daripada Kerajaan Negeri Sabah untuk membangunkan lebih banyak program RMM di negeri berkenaan. Sekian, terima kasih.

**Timbalan Yang di-Pertua [Dato' Mohd Rashid Hasnon]:** Ahli Yang Berhormat, sekiranya ada maklumat tambahan boleh disebut, boleh direkodkan kalau ada maklumat tambahan.

**Datuk Mohamad bin Alamin:** Ada, sekiranya ada apa-apa maklumat tambahan –

**Timbalan Yang di-Pertua [Dato' Mohd Rashid Hasnon]:** Daripada jawapan itu.

**Datuk Mohamad bin Alamin:** Daripada jawapan ini?

**Timbalan Yang di-Pertua [Dato' Mohd Rashid Hasnon]:** Ya, sebut sahaja nanti direkodkan.

**Datuk Mohamad bin Alamin:** Okey, ada sedikit maklumat tambahan untuk makluman Yang Berhormat Sandakan. Senarai sembilan projek di Sandakan.

**Timbalan Yang di-Pertua [Dato' Mohd Rashid Hasnon]:** Baca tajuk sahaja.

**Datuk Mohamad bin Alamin:**

PPR	Kategori PPR	Tahun Siap
PPR Taman Mesra	Disewa	2006
PPR Taman Gum-gum Jaya	Disewa	2009
PPR Taman Murni	Disewa	2011
PPR Sungai Manila	Disewa	2014
PPR Lintas Sibuga	Disewa	2014
PPR Taman Muhibbah	Disewa	2015
PPR Taman Batu Sapi	Disewa	2015
PPR Taman Harmoni	Disewa	2015
PPR Taman Batu Putih	Disewa	2019

Sekian dan terima kasih.

### Kualiti Pendidikan Prasekolah

**2.45 ptg.**

**Tuan Sivakumar Varatharaju Naidu [Batu Gajah]:** Terima kasih Tuan Yang di-Pertua kerana memberikan ruang kepada Batu Gajah untuk membawa satu isu yang penting iaitu berkaitan dengan 'Kualiti Pendidikan Prasekolah' dalam ucapan Kamar Khas.

Tuan Yang di-Pertua, Akta Pendidikan 1996 [Akta 550] memperuntukkan Pendidikan Prasekolah dalam sistem pendidikan kebangsaan. Melalui Dasar Pendidikan Prasekolah, Kementerian Pendidikan Malaysia bertanggungjawab memberikan pendidikan prasekolah kepada kanak-kanak yang berumur empat hingga enam tahun.

Demi meningkatkan kualiti pendidikan prasekolah, adakah kerajaan berhasrat untuk menyerapkan prasekolah swasta dan prasekolah yang dikendalikan oleh agensi-agensi lain seperti KEMAS, Kementerian Perpaduan

Negara dan lain-lain lagi menjadi sebahagian daripada sistem pendidikan kebangsaan.

Adakah Kementerian Pendidikan Malaysia akan mewujudkan satu Kurikulum Prasekolah Kebangsaan yang sama bagi semua prasekolah di seluruh negara? Ini adalah sejajar dengan seksyen 22 Akta Pendidikan 1996. Seksyen 22(1) jelas menyatakan bahawa Menteri hendaklah menetapkan suatu kurikulum yang dikenali sebagai Kurikulum Prasekolah Kebangsaan yang hendaklah digunakan oleh semua tadika dalam sistem pendidikan kebangsaan.

Apakah tindakan dan sasaran kerajaan berhubung dengan perkara ini? Tuan Yang di-Pertua, peruntukan undang-undang ini adalah penting untuk memastikan kanak-kanak yang dididik di prasekolah mempunyai pengetahuan, kemahiran dan nilai yang dijangka diperoleh pada akhir tempoh pendidikan prasekolah masing-masing.

Akhir sekali, saya juga ingin tahu apakah inisiatif atau usaha kerajaan dalam penyediaan kesamarataan akses kepada pendidikan prasekolah berkualiti bertaraf antarabangsa. Bagaimanakah keseimbangan dicapai dalam merapatkan jurang daripada segi kualiti pendidikan prasekolah di antara kawasan bandar dan kawasan luar bandar. Sekian, terima kasih.

**2.48 ptg.**

**Timbalan Menteri Pendidikan II [Datuk Mohamad bin Alamin]:** Terima kasih kepada Yang Berhormat Batu Gajah. Tuan Yang di-Pertua, Kementerian Pendidikan Malaysia (KPM) sentiasa prihatin dalam memastikan kualiti dan kesamarataan akses pendidikan prasekolah kepada semua kanak-kanak di Malaysia yang berumur empat hingga lima tahun.

KPM sentiasa bekerjasama dengan agensi kerajaan seperti Jabatan Kemajuan Masyarakat (KEMAS), Jabatan Perpaduan Negara dan Integrasi Nasional (JPNIN), pihak swasta dan badan bukan kerajaan dalam memastikan pendidikan prasekolah yang berkualiti. Sistem pendidikan kebangsaan sememangnya terdiri daripada pendidikan pra sekolah di bawah Akta Pendidikan 1996, seksyen 15 dan meliputi prasekolah swasta dan prasekolah yang dikendalikan oleh agensi lain seperti KEMAS dan JPNIN.

Untuk makluman Ahli Yang Berhormat, seksyen 22(1) di dalam Akta Pendidikan 1996 jelas menyatakan Menteri hendaklah menetapkan suatu kurikulum yang dikenali sebagai Kurikulum Prasekolah Kebangsaan yang hendaklah digunakan oleh semua tadika dalam sistem pendidikan kebangsaan.

Sehubungan dengan itu, bermula tahun 1996, semua institusi prasekolah awam termasuk KEMAS dan JPNIN serta institusi prasekolah swasta menggunakan pakai kurikulum prasekolah yang sama. Sebagai agensi kerajaan, KEMAS dan JPNIN menguruskan program pendidikan awal kanak-kanak mengikut Standard Kualiti Prasekolah Kebangsaan (SKPK) dan Kurikulum Prasekolah Kebangsaan (KPK) bawah KPM bagi memastikan kualiti prasekolah.

Walau bagaimanapun, seksyen 22(3) menjelaskan bahawa mana-mana tadika boleh melaksanakan kurikulum tambahan kepada Kurikulum Prasekolah Kebangsaan dengan syarat pihak tadika mendapat kelulusan bertulis daripada Ketua Pendaftar.

Pelibatan KEMAS dan JPNIN serta tadika swasta sebagai agensi yang menawarkan pendidikan awal kanak-kanak merupakan inisiatif kerajaan dalam

meningkatkan akses dan merapatkan jurang pendidikan prasekolah bandar dan luar bandar. KEMAS dan JPNIN juga turut dilibatkan bersama-sama KPM secara berterusan dalam penyelarasan inisiatif yang berfokus kepada peningkatan enrolmen murid dan peningkatan kualiti guru prasekolah di prasekolah dan tadika di bandar dan luar bandar.

Mulai tahun 2017, KPM telah menegaskan semua agensi pelaksana pendidikan prasekolah dikehendaki mula membuat pengambilan guru prasekolah baharu dengan kelayakan akademik sekurang-kurangnya Diploma dalam Pendidikan Awal Kanak-kanak. KPM akan terus komited dalam memantapkan kerjasama dengan semua pihak yang terlibat demi meningkatkan kualiti pendidikan awal kanak-kanak di Malaysia.

Tuan Yang di-Pertua, ada sedikit maklumat tambahan yang boleh saya sampaikan di sini, bahawa KPM telah membangunkan Kurikulum Prasekolah Kebangsaan yang diguna pakai di semua institusi prasekolah yang berdaftar di bawah KPM kecuali di prasekolah antarabangsa dan *expatriate*. Ini adalah seperti yang termaktub dalam Akta Pendidikan 1996, seksyen 22(1) yang menjelaskan bahawa Menteri hendaklah menetapkan suatu kurikulum sebagaimana yang saya sebutkan tadi.

Kurikulum Prasekolah Kebangsaan digubal sebagai usaha untuk menyelaraskan dan meningkatkan kualiti pendidikan prasekolah berpaksikan pengetahuan, kemahiran, asas serta nilai dalam enam tunjang pembelajaran seperti berikut:

- (i) komunikasi;
- (ii) kerohanian sikap dan nilai;
- (iii) kemanusiaan;
- (iv) sains dan teknologi;
- (v) perkembangan fizikal dan estetika; dan
- (vi) keterampilan diri.

Matlamat Kurikulum Prasekolah Kebangsaan bertujuan untuk memperkembangkan potensi murid berumur empat sehingga enam tahun secara menyeluruh dan bersepadu dalam aspek jasmani, emosi, rohani, intelek dan sosial. Ia dilaksanakan melalui persekitaran, pembelajaran yang selamat dan menyuburkan serta aktiviti pembelajaran yang menyeronokkan, kreatif dan bermakna.

Selain itu, ia juga bertujuan untuk meningkatkan kemahiran, menanam keyakinan dan membentuk konsep sendiri yang positif agar murid bersedia menghadapi cabaran dan mengikuti pembelajaran seterusnya. Tuan Yang di-Pertua, namun demikian, berdasarkan seksyen 22(3) mana-mana tadika boleh melaksanakan apa-apa kurikulum tetapi ia perlu mendapat kelulusan sebagai mana yang saya sebutkan tadi, daripada Ketua Pendaftar mengikut cara yang telah ditetapkan. Sekian dan terima kasih.

**Timbalan Yang di-Pertua [Dato' Mohd Rashid Hasnon]:** Terima kasih. Ahli-ahli Yang Berhormat, Mesyuarat Kamar Khas hari ini ditangguhkan sehingga suatu tarikh yang tidak ditetapkan. Terima kasih Ahli-ahli Yang Berhormat.

**[Kamar Khas ditangguhkan pada pukul 2.53 petang]**